

# Mud Volapüka

Nüm 25

23 setul 2016

---

## Rubrig gramatik

### Mu

Ladvärb „mu“ sinifon „vemo“, „vemiküno“:

**mu** balid = balid **se balids** = balid **muik** = büikün

**mu** bäldik = bäldikün = **vemo** bäldik

**mu** geilikün = geilikün **se geiliküns**

### Mö

Präpod „mö“ papladon fo maf bosa ad jonön:

1) mödoti kuratik *patöfa* bosa;

binom *geilik* **mö** mets tel = *geil* omik **leigon** metis tel = labom  
*geili* **mö** mets tel

binom *geilikum* ka ob **mö** zimmets deg = pluom obi *ma geil* **mö**  
zimmets deg = dif *geilas* obas **leigon** zimmetis deg

ped **mö** pauns lul su kvadazimmet bal = ped **leigon** paunis lul su  
kvadazimmet alik = ped **leigon** paunis lul a kvadazimmet

2) *mafi* patöfa pabetiköl;

binom liegik **mö** *flens* = **labom** *flenis* mödik = binom liegik **ma**

**mödot** *flenas* okik

## Nen, nes

Präpod „nen“ e konyun „nes“ jonons das jen jenon du bos fabinon, nekomon:

ädunom atosi **nen** dred = ädunom atosi **no** dredölo = **no**

ädredom du ädunom atosi = **no** ädredom dunölo atosi

ekömom nen ek = ekömom soaliko = ekömom it te (no edugom eki kobü ok) = ekömom kobü nek

eblinob boki **nen** nüpenäd = eblinob boki kel **no elabon** nüpenädi  
**nenlekredan** = men **nen** lekred

**nenpläoto** = **nen** pläots

imogolof **nes** sagön fovo vödi bal = imogolof **no** sagölo vödi seimik

äkömom **nes** fidön e nes drinön = äkömom e **no** fidom e **no** drinom

## Ni

Ladvärb „ni“ pagebon mödadilo telna pö set („ni ... ni ...“) e sinifon „no(ne) ... ed i no(ne) ...“:

köl gedik binon **ni** klilik **ni** dagik = köl gedik **no** binon klilik **ed i no** binon dagik = köl gedik **no** binon klilik **u** dagik = köl gedik binon **neklilik e nedagik**

exänob tu geiliko, sodas kanob golön **ni** föfio **ni** pödio = **no** kanob golön föfio **ni** pödio = **no** kanob golön föfio **u** pödio

## No, nö

Ladvärb „no“ e linteleg „nö“ jonons noami siama:

pod at **no** binon *redik* = pod at labon köli **votik lä(ka)** *redik*

pod at binon-li redik? **nö**, pod at **no** binon redik

**no** balna = nonikna **u** pluna

ukömom *pos* düp degid = **no** ukömom *jüesa* düp degid = **no**

ukömom *du* düp degid *no* ujenon

**no** ilavülof kloti ad klinik = klot binon miotik (**neklinik**)

## Noe

Konyun „noe“ sinifon „no te“:

**noe** nemü ok it, *abi* nemü klub = **no te** nemü ok it, *ab i* nemü klub

binom **noe** calan legudik *abi* flen süperik = binom calan legudik e *zu* flen süperik = binom **no te** calan legudik *ab i* flen süperik

## Nog

Ladvärb „nog“ sinifon „voto“ e jonon das jen dönuikon u fövikon:

**nog** balna = **zu** balna = **zuiko** balna

flor **nog** floron = flor **fövikon** florön

ven ikömob, **nog** äreidom buki = ven ikömob, **äfövikon** reidön buki = ikömob **du** äreidom buki = ven ikömob, **no äfinikon** reidön

vilob drinön **nog** väreti bira = idrinob väreti bira ya, ab vilob drinön väreti ona bal **zuo**

nogna = dönu = votikna

# Sevols-li, das ... Gvayän



1) Gvayän (Gvayän Britänik bü yel 1966id) binon län balik tö Solüda-Merop kö Linglänapük binon pük calöfik. Pö aldelaif mödadilo belödans gebons pükönamodi (dialogi) kreolik el ‚Patua‘ (‚Patois‘ Fransänapüko) u pükis netas okik – kreolis votik, lurduvi, hindiyi, tsyini, larabi e pükönamodis Frikopik distöfiks. Pöpatribut lindiyanik alik gebon lindiyi okik. Pö kosäd bevünetik Linglänapük ed el ‚Patua‘ pagebons. Nem läna bai bal lindiyanapükas topik sinifon „län vata gretik“.



2) Pün geilikün Gvayäna binon bel platik el ‚Roraima‘ labü geili mö mets 2875.



3) Tö Gvayän vatafals plu 300 dabinons, gretikün onas binon vatafal skailafomik el ‚Kaieteur‘ (labü geili mö mets 226 das pluon lulna geili vatafala famik di ‚Niagara‘).

4) Pö Gvayän komots mödik netiks ä reliks kebinons püdiko. As sam, dötumanums plu 50 belödanas lecedons oki kritanu reledas distöfiks, dötumanums 35 binons slopan hinduta e dötumanums 10 binons smaelitans. Pro belödans topik binos nomik ad mödikans onas votükons cedi (levalidacedi) relik lönik pluna ünü lif.

5) Lindiyans (belödans rigik läna) jünü no pafiziläkon ini nef Gvayäna. Utans topätöns tö ziläks ninik e nomadons, bejäfölo me päskar, yag e flukiklopam.



6) Pleds löfik Gvayänanas binons cög e dominov.




7) Patäd cifazifa el ‚Georgetown‘ binon boadabumäds pibumöls ün tumyels 18-19ids (datimäda kolunäna Britänik) kels laiblebons gudiko. Aniks onas labons kläpedis boadik ko spad patik pro glad, kels pidatuvons fa Yuropans. Bïo kolunans monemik iseitons gladi (päveigöl me nafs de nolüd) ini spad at ad koldülükön lotidi. Logöfot ledinik zifa binon tem boadik geilikün vola – tem hisaludana ‚George‘

(,St. George's Anglican Cathedral'). Klokatüm tema papladon ön geil mö mets 40. Bumäds ti valik tö zif labons teadis no plu kil.

8) Kritid binon zäl netik Gvayäna, toä pazelon fa te kritans. Doms e pams nilü ons padekons me festuns, e hiel ,Fatül Kritid' komon zesüdo pö balib, kapüt e plädot to hit mö grads plu 30.

9) Gvayän binon motedalän vifagolana jiel ,Aliann Pompey'.



Säkis, küpetis e lofotis aliks ä materis e volanuns nitediks kanols lüsedön lü penedabog «komunan@yandex.ru».